

四庫全書

集部

欽定四庫全書

集部

陵陽集卷五至八

詳校官庶吉士臣張溥

主事臣呂雲棟覆勘

總校官編修臣王燕緒

校對官編修臣蕭九成

謄錄監生臣王應增

欽定四庫全書

陵陽集卷五

律詩七言

次韻李千秋中秋

節物詩情總索然漫將梨栗當盤筵
堪憐永夜空樽月記取衰翁斷酒年
十日尙留花影在兩餅便作竹根眠
分明破戒緣佳句免使兒童誚禁煙

元牟巖撰

癸卯入日送李千秋還杭

喜聞晝晝初回棹便擬共公吟過春何事客鄉還送客
今朝入日更愁人風吹杯面梅花老路轉裙腰草色新
只恐西湖留不住重來好為活疲民

失題

篇章何事等嬉游尚想揮毫剪燭秋從古殺青徒自苦
只今醉墨可能求忽傳鷺立沙頭句又見鴻歸天外州
襍研去來須猛省不由自己更誰由

歲在丙辰元日立春是時先人守當塗郡齋賓
客雲集皆用元祐八年東坡和王仲至秦少游
詩故事所謂省事天公厭雨回先人笑曰天公
省事今乃多事耶今三十有九年矣追念感慨
小詩聊記當時笑談之語

憶昨姑溪歲丙辰老仙元日去班春當家句子頻催客
省事天公却笑人紫鳳天涯今已老泥牛歲首又還新
笑談誰記當時選獨立東風倍愴神

和任東津山長

吳興學法徧諸華吾道元無邇與遐今日誰能缺下馬
古人猶自酌先茶肯開燕豆驚流俗共喜臯比得當家
入手新詩惟重拜頡頏那得並飛霞

和汴教耶律伯明

翩然來自舊京華歷數山河不謂遐往事已空惟重黍
元談未了更澆茶南遊句好俄驚座東道情深未憶家
也欲衛州門外去一聲長嘯入煙霞

新城羅氏棣華堂

中和偶向此枝藂友愛當知吾意同十世共居尤盛事
一家三代共春風試看華萼相扶處正在閨門載翕中
昭諫而來名節偉更添新記與無窮

寄昌化孫梅泉

揮手秦稽信宿然未行俄已兩週天雲緘尺素惟開後
雪輓雙溪恐墮前高誼誰能似孫宰舊題應復記蘇
仙何時布韞青鞋去摘野芎苗古寺邊

送季雲在學錄

橫經之暇即吟詩三載如常匪激隨聽雨不知官獨冷
看雲自與意俱遲輦飛鸞宇生新敬鵠立儒衣動去思
還恐西湖難久滯此聲梁楚已先馳

次韻九日寄史推

弁有山兮水有湄登臨捨此復何之髮疎帽脫狂嘲後
鴈過江涵感慨時盛府主賓俱好事滿城風雨苦吟詩
人生自可行樂耳劍首功名但一吹

次韻寄史彥明

等閒看盡弁衡毗旁郡聊從捧檄馳
候管乍披新定志郵筒忽見故人詩
君方清絕行明鏡我正催頽据槁枝
為喜綵衣還膝下椒拌趁得頌花時

答朱薌林見寄

天目羣仙帝所毗別來引領但神馳
分明輸與薌山老活脫吟成玉局詩
論舊驚心幾甲子扶羸筇覓一筇枝
如公再合幡然起勿戀春先筭歲肥

次韻李侯喜雨

誰似當年召信臣
天教來此活疲民
水鄉怕旱相傳古
甘澍隨車總是春
坐看豐登成樂歲
只將愷悌對明神
已聞宣布彤歌詠
賓主殷勤用意新

謝李侯枉過

鳴騶窮巷忽相過
其柰將迎窘步何
每望故都身不羽
欲賡新句硯空磨
籃輿端復為公出
泥飲唯應說尹多
却是旁觀工指點
若為公錦雜漁蓑

長兒授館於杭每休暇過仲實家相與譚經析
理間則飲酒賦詩為樂今閏秋十四日會於復
軒相視而笑曰好天涼月即中秋況今歲兩中
秋予迺留飲劇論夜參半蟬聯不休情愈郁穆
予聞之甚喜因為詩寄之

共飲方酣月滿樓劇談無寐露侵裘此宵此景應難
值吾婿吾兒亦罕儔情誼渾如同一姓風流不負兩中秋
絕憐老子婆娑甚破戒何當大白浮

和陳無逸木犀

秋旻金氣正高張併作西風一夜涼何處杯中無白墮
如今扇底有黃香自慙老拚如犀禿却笑春花為蝶狂
勝賞清吟兩奇絕吳山橫過即仙鄉

和仲實秋興

金飈吹暑頓然清聞早空庭一葉驚挂頰偏宜對朝爽
揮毫正好賦秋聲鏡中髯短休煩鑷壁上絃閒不受繫
志士由來多慷慨何如百轉聽鶯鳴

黃元靜飲客蒲蓮海中殊勝絕

扁舟徑入芙渠國一筇俱非褫幘人低拂柳陰偏障暑
活烹茱萸快嘗新小巾脫去我先醉大杓取來渠更真
啜醕數觥詩興發羨君越漾老精神

次姚子敬簡高司丞

西風小立對晴川冷笑人間目聖顛使事端因荔枝出
歸期休在菊花前平生漫說少陵老終日誰陪上界仙
應是杜中鵬與鷺詩情比舊更依然

王梅泉生日惠詩次韻答之

堪笑衰翁作計狂又隨筇筇到魚梁
未秋早覺凋蒲柳已老安能種豫章
誰似讀騷仍飲酒有時贊易自焚香
梅邊有約君應記但愧年來久覆觴

白賁

致飾雖云賁則亨含章內照乃為真
離明外附天光發艮止中存道體純
玉質未雕虹貫日素功後繪物生春
也應笑我元猶白不比羔羊正直人

次韻

大海相環宛一洲浮漚乍起已千秋三壬笑向人間世
四癸時尋物外遊我輩安能知許事平生未若樂斯丘
開窓翠竹時相對更說諸餘總謬悠

送程晉輔長和靖

傳家氣脉固深長挾策來登和靖堂南渡金聲元不泯
西庵草色可能荒要知持守為涵養好把精微重發揚
共喜慈幃得甘旨他時遠到未渠央

趙君寶宣慰別三十五年矣末由再晤近張倩
仲寶轉似西湖詩圖乃知吟嘯湖山之樂輒為

五詩奉答

南屏環擁翠雲堆誰遣精廬特地開祭酒先生甘隱遯
燃藜太乙忽飛來胸中礪硯五千卷門外芙蓉蕖十萬栽
白日竟拋妻子去羣仙攜手上瑤臺

右南屏書院

橘園亭畔市多塵麴院橋邊境轉清山色湖光精舍敞
筆牀茶竈釣船輕奈何一字不堪煮且與三賢相竝行

笑問壽藏何早計不妨更學趙臺卿

右西湖書院

毅齋大老除

缺

名節尤偏無所尊曾是臚傳第一唱

却留衣付外諸孫挹按柳汁初承渥稱泛霞觴共拜恩

尚記吾家多夙契何當握手得重論

右鄭夫人傳

伯子堯夫豪傑人四時佳致四時春靜能觀動一機活

會復乘元千古淳造物生生還化化世情故故又新新

不妨長向亭中醉自覺冲融氣味真

右四時春

平生知舊一李友別後長闕白板扉偶有客來孤鶴起

也無人覺小舟歸儘渠俗子頻相惱只恐仙禽未肯飛
莫笑爨琴并煮鶴醉眠林下兩忘機

右小舟歸

孤鴈

如何苦作斷腸聲度盡關山夫弟兄萬里他鄉誰是伴
單棲半夜若為情嗶嗶每嘆衆人薄落落孤將一意行
只恐影沉湘水後更無來者繼高名

贈陳東洲

散髮披襟頗自由野麋見客忽驚投新詩生怕將愁至

博學何妨與藝游未說天邊金彈子試尋城外土饅頭
不然且學伯倫醉荷插相隨死便休

題陸起潛皆山樓

醉翁朝暮四時景誰遣描摹入此圖喚作皆山真箇是
攜來到處與之俱也曾佳客相陪否亦有清泉可釀無
更喜一般僧侶舊高樓百尺俯塵區

送屠存博教授漂水

直道方心古所難任渠俗眼笑儒冠子龍有屋猶黃壤

老鄭無壇漫冷官一片湖光清客署三州鼎足屹書壇
只應翠綠迎人意歲月功名正好看

送鄧南俞教諭

試把溪堂舊譜看三千首荷守酸寒吟肩祇自初來瘦
寔尾方知細滿難憂患可能期學力功名終不誤儒冠
到家莫作多時住趣取秋風送羽翰

絕句五言

賈節菴冒夏暑越修塗過我苔雪情誼甚厚令

聞古式無思大節不可復見而骨肉消息訪問
難真相對殆感慨不能為懷青燈夜語誦少陵
夜闌更秉燭相對如夢寐之句意甚惘然其歸
也兒曹以此為韻賦詩道別余亦作焉哀老拙
惡姑寫我懷且以卜後期云爾

君留劍水潯我卧弁峰下十書九不到思君無日夜
一朝忽在眼喜極生悲酸老淚如撒菽淚盡氣亦闌
事故不可料柯爛碁局更兩家骨肉內往往隔死生

英英君令弟介烈夙所秉就死得處所我意復何恨
吾女去二穉何處吞聲哭忠孝果何辜神理諒未燭
君能為置後此意不可忘嶢嶢峙頭骨正好玉其相
自言勤教督燈火與之對泉明定不孤門戶期汝大
我為饑寒困坐遣恩義疎君固不忘我我愧當何如
連宵接軟語共說夢中夢聚行時未多歸驟忽已動
別錢別尤苦輾轉那得寐後會倘可期握手三致意

拂秣天馬圖

赤手謝銜轡踏蹴蹴九衢健哉此女子果勝大丈夫

和漁具十絕

買得五瀉舟江湖落我手呼兒下筍去此事渠能了舟

卧吹月明裏龍吟鼉打鼓別是一家風荻花擺頭舞笛

披時響蕭騷卧處堆偏仄傲然煙雨中安知有睢澤蓑

輕圓兀其顛不受暑雨厄時將蓬外挂旋轉卷七澤笠

裊裊不自持何以制沈疇聊懸一魴餌鯨鱣未可狎竿

彼已苦其密此猶患其疎歡呼試新罔一舉雙白魚網

熒熒枯蚌中急雪灑不滅西風明日晴雙花為儂結燈
呼風忙趁魚一片如掌大且等後船來過船猶早在
登登遠還合聲從何處起魚走潛深波禍在深波裏
即此是庾冰醉棹舞波面何似宮亭湖為我覓如願

楫

贈薛東湖

抱疴蓬廬下白日背我馳我生已如此天命復奚疑
悠哉東湖水不迎亦不隨相對澹無談可以樂我饑
希年初度老友王希宣扁舟遠訪夙誼甚厚貺

以十詩實用淵明采菊東籬下語五章云每
歲思親不持竿蓼莪幾欲廢詩雅蓋深知予
心者讀之淒然輒爾和韻

行年似啓期顏髮日夜改此身尙我累掾粟時自采
古人歌既醉其中有五福如何憔悴者忍飲但餐菊
有酒巾可漉無酒盞自空但懷停雲友相望各西東
九日把壽酒時節無差池我生秋已老菊荒而崩籬
扁舟過寂寞十詩繼騷雅定是王弘孫猶記南山下

淵明六十三我已多數秋未死亦偶然神仙殊謬悠
平生遇初度何曾具盤筵感君知我意老淚更潸然
人生百年內榮華僅少選何似鷄黍約歲晚長相見
憐彼武昌柳搖落向江潭虛名竟何益北斗與箕南
淵明詠三士講學馬隊間斯道幸不廣石高媲廬山

溪邊釣船

莫出前溪去隨宜下釣鉤風波苦不惡鱸鰕滿船頭

方竹杖

此君久不見歲晚伴華顛直節要到底勿論方與圓

題東季博山園二十韻

是誰按藍染千條萬條碧我欲問東風東風澹無迹

垂柳

輪囷肖天巧霑霽含雨意惟應野老知此是豐年瑞

雪瑞

雲卧不禁冷誤把岩扃觸翻動若木枝紅光被空曲

東壑

落落金彈九飛鳥不敢下盧橘不到吳楊梅同過夏

枇杷

鵝

行行西崦西暝色蒼然入芸芸各歸根我亦坐內息

西崦

綠醅春灩灩綠水煙渺渺百年散誕內空以愁自繞綠繞

倚闌發長嘯援筆記舊遊想見同來者俱非第二流第一

溪

桃源逃不徹真境宛在目要令千載下知有古風俗桃源

泉脉十字過石廉千里通汲來聊煮茗風味故應同小谷

簾

青青南澗芹雪消春已動如聞修廢簞岩半發流湮南澗

窮鱗無處避網罟如雲密悠然釣臺畔袖手看落日釣臺

神仙好狡獪空飛萬里行石橋小如許鐵杖響彭鏗

石橋

捫蘿上復上未省所歷高忽與歸鴻值萬里一羽毛

山亭

冷石眠夏天冰室透毛骨所以安樂窩大暑苦不出

安樂

窩

澄然蓄清瀟百尺往往深不放寒漚發可以觀我心

寒湫

此處若為關自來還自去中有無心人不妨相伴住

雲關

都將千石危化作一林雪盡日無別香五月何曾熱

蔭蔭

林

幽人讀書處皎皎霜月爛香影不可掇高花在岩畔

梅岩

別來五百歲於焉駐颺馭吳市梅子真解后亦神遇

仙聚

好著在眼前世上少人覺留此妙不傳付與神仙著

仙奕

張敞畫眉圖

睂嫵臣罪小君王一笑休明日章臺路便面越風流

相如撫琴

不負百年心琴中托意深如何渾忘却猶費白頭吟

猿鹿圖

野鹿正周張猿投兩臂長由基方逞巧何似總相忘

胡孫圖

山果包已盡克然兩嘯中雄雌自相命擲葉老秋風

陵陽集卷五

欽定四庫全書

陵陽集卷六

元 牟巖 撰

絕句七言

已巳秋七月不雨人心焦然迺戊午齋宿致城
隍清源渠渡龍君醵山五神于州宅以禱始至
雨洗塵自是間微雨輒隨止旱氣轉深苗且就
槁要神弗獲某憂懼不知所出越癸亥日亭午

率郡僚吏申禱於庭未移頃雨大摯旄麾呼舞
皆曰神之賜也某既拜貺又明日以神歸念無
為神報者乃作送神之詩七章以侈神功且又
以祈焉

休休早稻已焦卷晚稻搖風更可憐枯盡百源無一滴
老龍何處卷雲眠

幾度看雲眼欲穿不應氣數總關天去年兵又今年旱
守也於民自寡緣

五神萃止足精神迅發風霆一欠伸能事莫嫌相迫促
門前多少望霓人

老火猶驕氣蘊隆爐香熱罷日方中片雲忽卷天河落
頃刻難名造化功

神祐恭惟及物深中間感應妙精勤要知應處還為感
終始惟當秉一心

眼前物意頗昭蘇未省郊原遍也無更覓洗車三日雨
普教大地活焦枯

龍輶欲駕已多時父老遮留一日遲秋菊寒泉何以報
精勤更寫送神詩

都梁北鄉士多好學有向君敏衡者一日訪予
語甚質氣甚夷禮甚度予心異之間為予言曰
家故沅徙也今所居有谿實自沅來乃築室聚
書其上以教子弟因以沅溪書舍名之而其亭
則曰無加蓋其地舊號無加莊以其東止於石
西止於岬南止於路北止於泉也願有以發之

予既為籀右書二顏而向君復以所謂廉崖者
諭予予聞此石傑立千尺實峭厲峻削可敬可
仰有類乎廉者頗思一至其處摩挲此石以激
衰懦而未能也乃各為一解以謝焉

書滿精廬正繞門門前流水出於沅夫君自得濂溪意

直向云云認本原

周子寓匡廬號濂溪
溪書舍者本春陵故居也
右沅

無加之義復何如解盡當年太極圖

朱子曰太極
者猶曰舉天

下之至極無
如此云爾

八面四方都恰匝更於止善用工夫

右無
加亭

廉崖千仞孰能干一見令人毛髮寒可以人而不如石

我當為石共衣冠

石廉
崖

予方卧病稅院劉君以畫梅堅索詩口占遣之
今年四野赤如赭安有吟情到此花何況病夫空百妄
只於真實認根芽

題德範弟三香圖

水仙脩食老逋家更著江南小白花三雅如渠好兄弟

衆芳未許以肩差

次韻洪帥喜雨

礮車亭午作雲頭
喜雨亭前黍稷秋
但得人間甌窶滿
等閒萬慮一時收

感孚妙處捷風雷
造化於人豈遠哉
見說商霖一尺字
向前車馬待公來

遊高園用前韻

蟬聲緊喚客回頭
依約疎僚去後秋
不是先生新句子

一川雲錦費勾收

儘渠絃索輓春雷相對清風君子哉涼觀主人歸未得
不妨却許蜀人來

和本齋止酒

白家老瓦慣從游和氣如春不汝郵近日更誰嫌外酒
夢成燥吻吸青丘

羨渠痛飲日亡何一石如髭亦未多麴米春濃禁不撤
酒腸笑我本無它

聞公久矣空諸妄止酒真成一事無舊說蜜殊惟飲蜜
不妨試候小風釭

生憎市酒赤如霞難效當年老阿嘉一任花前殺風景
破除舊賜小龍茶

酒名真一妙形容方法傳來玉局翁搖動天關出瓊液
澄然不比小槽紅

病餘井臼不任勞欲飲無錢可是高一笑猶堪誰空腹
少陵詩裏學焦糟

送程茂叔

天涯忽送非常喜
阿囷斑衣郎罷前
話盡青燈十年事
牀頭周易故依然

真成有子萬事足
何況人生七十稀
莫道梅花遮五嶺
頭輕月朗去如飛

贈羅竹山術者

此君乃肯與人事
辯舌生風有竹山
何似竹林惟痛飲
嗒然臧否兩相閒

魚須翠碧都拋却重簪今居卜隱中門外有來能握粟
為渠滿意說年豐

犍紋紙帳稻畦衲楫拙地鑪煨芋供此是人間真富貴
莫將輕易許渠儂

和陳無逸中秋風雨

身似浮槎何足絆家同墮甌不須看枉栽白髮三千丈
可柰青泥八百盤

病攻我劇聲摩壘月避人深目眯糠一盞濁醪如許障

諸餘不容苦思量

餞高仁卿農丞奉使還北

常平舊法最為良
頗記中丞耿壽昌
此意推行在人耳
肯教豐歉制低昂

好農使者憤經常
歸路西風水國涼
但使人皆歌美稷
故應此即是甘棠

別來五度見重陽
草草賓朋共此觴
聽得酒邊新句子
可人風味故難忘

裝輕路穩好兼程
還向鷓鴣班侶雋
英自葉流根誰識
此
老農摩腹送餘生

舜舉水仙梅五絕

橫出一枝誰與並
整青蔥佩立多時
忘明几淨好風日
移向此中渠不知

檀暈金杯兩擅奇
晚風併作一香吹
此中畢竟同還別
付與司南鼻孔知

雪梳冰甌薦茗時
蕭然相與對幽姿
一生肝膽何由俗

時有清風披拂之

當代涪翁有素評此花雅合喚梅兄
玉宸殿上重差次
可是詩人許與輕

老逋久共梅同住好事誰令侑酒仙
變化侯王等閒耳
不堪持到影香前

舜舉馬

常得奚官剪拂齊也思驪首一長嘶
好隨便面章臺去
柳色如煙路不泥

秋江晚渡圖

晚來江上鯉魚風十里青山一望中自是欲歸人意急
等閒付與濟川功

夢會圖并叙

趙堯卿嘗夢東坡野服乘驢訪之顧室中書史環列
喜曰天下之樂無以加此他日又夢問以水仙王事
即答以茫昧語堯卿與斜川游稔而是時方補注坡
詩故心誠所感如此今翰林張周卿所記澄照德公

之事人皆以為異余謂東坡之精神無往不在而平生喜佛言句流布中土歷劫不磨豈非澄照素知向慕雖亂離奔走結習未忘有以得之歟一以詩一以禪所趨雖不同而所感未始不同也樂廣以形神不接而夢為因東坡為之說曰心依塵而有夢夢覺之間塵塵相授數傳之後失其本矣豈非因乎信斯言也二會之夢東坡必他有所因使因東坡則數傳之後不當復為東坡故竊有疑於其說然澄照夢公時

年六十有一而其壽至一百有十四則倍壽之語亦
幾矣正甫御史視澄照為同姓是宜保其圖而登其
壽二小詩附下方

覺來猶記舊儀型
趺坐無言月滿庭
畢竟是因還是想
不妨重舉夢齋銘

洛僧加滿九十五也向香山畫作圖
況是東坡曾囑付
壽年多似手中珠

題戚子雲五雲圖

一從鰲去波翻海夢斷蓬萊不可尋當日五雲依約處
有人掩卷自微吟

金南峰隱居圖

高哉千丈屹南端路入層雲欲到難試看幻輿岩石裏
人間爭似畫圖看

身在山中不見山却因遠看更孱顏煌煌三秀如堪采
拂石眠雲未忍還

四安道中所見

蒼涼初日破林霏幾度言歸今得歸兀兀籃輿續殘夢
門前兒女挽人衣

分明路入茶山去喚起昏昏嗜睡翁共策翁來已差晚
珍芽秀甲老秋風

一溪百折渡復渡尋日如行糾篆中自歎勞生欲飛去
琴高借我赤鯁公

何事區區外謀光五漿先饋豈其當儘渠爭煬仍爭席
物我而今已兩忘

生怕秋蟲稻把稀腰鎌爭出傍晴輝
尻高首下泥中鶴啄得黃雲盡始歸

狹路傾欹下澗隈歸牛忽帶夕陽來
狂遮瞪視渾無柰憑仗誰人拽鼻回

紛惹多岐意轉猜若為誤向此中來
平生不作窮途歎途若窮時一笑回

依約茅茨傍翠微炊烟孤起半開扉
早禾趁日連耜開老莢爭風拍板飛

木瓜已過折山來黃帕封林未敢開想見白沙紅照裏

繡紋冷落見奇瑰

木瓜園入折山數里供進後方敢賣土人取瓜埋其半於沙中以紙鏤花

貼上以溪水酒之日晒乃紅

千顆豐融怕日侵楮生調護貴於金直須待折囊封了

方見冰霜一片心

薄酒三盃醉不成雨敲疎瓦見分明破衾判作空堦滴

滴到乾時也解晴

聽得荒鷄第一鳴吹燈發火飯初成衣囊減盡渾無袂

又是蕭蕭帶雨行

崎嶇踏破布行纏負米擔鹽似蟻緣為羨生涯隨處足
五湖鮭菜范公船

人向長安渡口歸長安不見但雲霏只應白鷺曾相識
船到前頭更不飛

可是茅岡太無賴苦要錢足刺船行却聞官路相將近
便覺山輿陡頓輕

千山過盡又行脚慚愧道人看客勤衰得白雲欲相贈

一甌茶復白於雲

斧斤不貸老根株
素節蒼皮委路隅
憶昨此中逃午暑
前知愧不及堯夫

落落長松不許年
輪囷板幹欲參天
流肪已化為神物
枉損蒼鱗亦可憐

姑溪小隊帶薰風
笳鼓懽迎鶴髮翁
三十九年成一夢
幾多陳迹淚痕中

每羨向平婚嫁了
恣游五岳可曾回
也應未斷塵緣在

依舊挑包入浙來

支離病骨倦泥行擬向蓬窓睡到明
繞鬢秋蚊故相惱更求底物是親情

亭亭明月無人伴一意孤行天地間
憐我扁舟連夜發肯分清影到蒼灣

中秋有約竟須歸未到家時月已隨
不合盡情看到曉今宵殺漫雨垂垂

兒能忍渴留佳醞我亦開包得快梨
自笑初無泥可洗

頽然還得醉如泥

歸途擬向城中去論舊翻驚人已非
悵望敬亭烟雨外平生漫說謝元暉

題羅御史詩

諫草詩篇好護持又吟蜀井竹西詩
攜將高節堂前去題作雲蒼也更奇

丘詠涯

聖道洋洋陋百家就其淺矣詠其涯
直須辨取槎乘去

未許當年海若誇

月軒

坐嘆冰輪吐復吞
長風忽為拂霾昏
褰開萬里無纖翳
到處人家月滿軒

題擇庵雲山圖

老圓畫裏也藏機
雲抹前山凍不飛
寸許塔尖何處市
扁舟臘日訪僧歸

約家性存

春風小語記懷岷二十年中臂屈伸白髮遺民幾人在
重來老鶴更精神

蕭條今尚有誰來老盡荒庭一樹梅多謝高情肯相過
衝寒自起掃蒼苔

送李際可婺源學錄

說看瓊臺氣塞胸天教有子慰孤忠春秋為喜一經在
兄弟誰知異姓同

乃祖當年洗日功特書賴有紫陽翁此邦況是淵源地

好玩遺編振緒風

羯鼓圖

春光一曲透霓屏紅錦綳中養不廷誰道青峰白雨點
開元宰相也渠聽

山礬圖

玉殿何勞定等差弟兄俱是老涪家季方也與新名字
免得人呼作場花

贈東臯講師

飛錫曾聞五臺去雲間瑞相是耶非
我眉清現更奇絕
萬里白頭吾未歸

東臯何事字無功講罷應知萬法空
時枕苔溪作歸夢
臨平一路藕花風

送戚性傳

睢陽書院戚先生綸也名孫侍從臣
文物相傳今幾葉
又開講席淑來人

送蕭之剛

旬宣幕府得君重直到千峰盡處回聞道棠陰闕

倦書圖

日長偏困校讐人袖手旁觀亦欠伸一覺黑甜甜午枕
絕憐識字苦勞神

誰道春酣雨不禁蒙蒙籠眼色透雲屏著人花氣深於霧
却是三郎睡未醒

題高麗字跡

片紙殷勤贈跋篇來從箕子舊朝鮮六經原不經秦火
好為刊傳惠後賢

毗山之居不皆竹也而其所尚友獨在竹遂擅
此山予觀野縱橫陳荆扉半啟小舟划柳下不
覺欣然呼渡徑入萬竹烟霏中山靈頗怪俗客
何自來耶因留詩云

指點山居向那邊閉門花木養風煙隣人不饌蒼玉束
一一而今欲造天

山人猶未出山時風月雲煙總為詩笑問年來間何濶
此盟應有此君知

右軍書裙帖

戲將墨妙寫煙雲曉起驚呼失素裙盡洗當年羞澁態
從今不比舊羊欣

題四畫

天氣融和凍已開桃花浪暖亦佳哉人生辦取東南尉
底用一雙鷗鷺來

多情宛頸兩鴛鴦貪趁湖心錯裏香散髮幽人休盪漿
夜深花露濕衣裳

金飈爭放木夫容蘸影清波分外紅玉立前庭一公子
丰標不與俗人同

積雪凝寒不肯融梅花佇立待春風嫩波正比鴨頭綠
厚葉休嗤鶴頂紅

南岳魏監廟曩自請奉祠恬於聲利十餘年來
益閉戶讀易人罕識之余托嫻且契比來吳惠

教五絕篤叙故舊情誼藹然用韻復寄不足酬
盛意

人生一世匆匆爾筵帙亡何已旅酬南岳鑪頭芋初熟
等閒知閱幾春秋

誰知白鶴早登門遺墨猶餘屋漏痕師友百年同慧脉
固應自有不云存

全真閉戶魏不琢二紀怡然外世榮留得詩名皮陸集
到君句法有餘清

阿囷離鸞嗟囑耳誰陪老婦祭餅盆二雛幸足寬懷抱
共說河汾有外孫

靜探五一共誰論悔不當初逕扣門自笑吾元今尙白
刻舟空守舊時痕

三禽

何處飛來把修竹數聲圓活夢還驚雨鳩那解知人意
寂寞梨花雨又晴

風裏空餘碧玉柯離離秋子不勝多莫教却向人間語

金井銀牀愁奈何

送恩上人還雲門

當日親曾見珙公如雷辨舌振宗風
分明句句字字是又向蒼川訪病翁

澈師何處覓遺踪坐聽雲門寺裡鐘
正自年來苦行腳箇中元自有千峰

挽詩

挽楊知府

蜀有古愛直公為令子孫駐原魯婉畫治獄輒平反槁
落榮觀盡紆徐雅道存靈光洞却火德齒晚彌尊
翫體羣飛外康強七袞餘耆年猶謹禮細字每抄書十
載甘琳館三州奉板輿挂冠天本可雙犢老康廬
見說佳眠食遺身疾自無方期操几杖俄已易牀膚久
讀耆舊傳仍聯嫁娶圖湘岑望不到灑淚向天隅

挽師叔理

卓爾見成錄超然驚絕塵形骸脫邊幅肝膈炯精神正



自關天分應難語俗人誰收身後藁雋逸更清新
已飽憂患味方收翰墨勲龍飛新進士猿臂老將軍千
里推車軸羣工愧斧斤天乎如有意更為續斯文

四海東坡老平生秦太虛神遊已冥漠坐念更欹歔手
墨看猶濕心期炯未疎堪憐疇昔語腹痛勿驅車

挽趙春谷

墮地追風驥垂天駕海鵬嗟哉中道止藉甚到今稱幾
士待舉火一生甘飲水居然使跼壽念此拂人膺

子美轉同谷靈均懷此都修名千載短多難一臣孤天
意終難料心期自不渝西風吹更急蕭索間泉途

北弁方胥會西崦遽莫追津梁摩詰病臺治雍門悲鶴
有還家夢烏無反哺期瀧岡松檟近足慰九原思

挽孫太監

理王愁聞薤露歌向來耆艾日消磨平生所至棠陰在
晚歲其如麥秀何洛社竟虛同甲會鑑湖應改舊時波
四春手植煩調護萬感今猶憶爛柯

卷六
挽陳本齋尚書

在昔實齋老公能繼盛名平生守師說晚歲萃儒榮
裡赦原兵禍臺網忤物情抽身甬東去騰上幾公卿

天俾公多壽人知道不孤超然一室內不與萬波俱
甲子新詩藁烝嘗舊布襦何妨傳遺老文字照龜趺

挽王厚齋尚書

清要三朝望文章一世榮掌綸誇獨直荷橐表羣英
石室資殫洽金華賴闡明孤臣傷暮景風雨自鷄鳴

開慶言容悅咸淳奏直前每逢時宰怒自保哲人全垂
世三千卷歸田二十年汾亭有遺操獨拍淚潸然
文獻遺諸老風霜魯殿餘斯人不可贖吾道意何如永
念年家好曾聯選部居無繇陪縞送東望淚沾裾

挽陳本齋尚書

補遺一首

有意超塵俗無心愛夕暉勸餐惟屢却持壁竟全歸
得正復奚憾偷生良所非傳家孫子盛端不墜前徽

挽成義峯

輕舉游惟宅高辭神武門賜湖分老監遺笏付諸孫王
映神尤朗丹成道自真只應峩頂月萬里照仙魂

吾叔聯姻好當年記漢嘉回頭一甲子遺恨滿天涯尚
喜長庚老俄聞大耋嗟區區論疇昔何處挹蜚霞

挽趙止善

自處若素士不知為貴游多聞每是正寡欲更清修方
借望郎重已深宗國憂嗟哉事竟爾喬木委林丘

昔日三株樹彫容頓可驚一癯危獨坐多難失孤撐官

舍煎茶夢天涯
裏飯情無由送
車後投淚愧平生

挽親家孟從吾

東野哭其子難存
百感身孤孫猶在
抱行路亦沾巾
滿目家園樹何時
淚葉春諸生為執
紼良足化鄉人

挽岳君舉

五十餘年事都將
作夢看早方磨鐵
硯老遂葬桐棺
蟻結途方戒駒馳
歲已闌山前一片
石讀者為悲酸

挽姚景春

昔在仙都世人稱善士門丘山嘆華屋風雨長孤根鶴
瘦空餘影鴻冥更斷魂植齋書萬卷喜有外孫存

挽趙碧蘭母劉氏

苗裔真王後儀型老監同庭惟參玉樹氣未感秋蓬衣
制先期具舟藏半夜空故應芳懿在位刻賁幽宮

挽張師道

少日追楊晏由來間氣鍾兩科無近比萬里有奇逢正
喜鰲扉重俄驚鵬舍凶輅車方遠稅已見若堂封

在昔台州守先人事分多通家能記憶上冢每來過老
我病未死送君情柰何賢哉幸有子健翮看雲摩

挽唐學賓

奕世詩書味端知積慶長於人不畦畛為世作津梁肯
助魯修泮能令齊發棠陰功天所相食報在諸郎

陵陽集卷六

欽定四庫全書

陵陽集卷七

元 牟巖 撰

雜著

喬木亭銘并序

晉國王公祐手植三槐於庭雖不作王溥官職而其子
文正公旦為名宰相孫懿敏公素為名諫官名將帥曾
孫輩蘇文忠公為記三槐堂稱其好學而文以世其家

又為作懿敏真贊發明故國世臣之義以為世臣者其
勲烈以著於時德望以服乎人譬之喬木封殖之勤養
自拱把以至合抱非一日之故其論懿敏公之父祖子
孫蓋足以當之予倩張栢字仲實循王五世孫追維前
烈寶其舊物近又復喬木之亭取蘓文忠公所稱王鞏
定國者以銘其亭曰

循王甲第吳山之麓勤身事國蟣蝨刀韉而不要殺一
念純熟三十年間種木繞屋厥木惟喬異彼樸檉爰自

芽蘖以長以育以至拱把合抱連幅忠根義幹積善滲
漉其陰數畝萬世之福我思其人猶愛其木曾是比隣
弗戒樵牧僅逃斤斧容慘神辱維時聞孫有惻心目贖
之以歸天實從欲汎埽其庭雲漲新綠婉美王氏三槐
鼎足日有清輝如晞膏沐風有清音如韻琴筑可娛其
親可庇其族我誦角弓封殖是祝自今伊始公侯必復
萬葉子孫並受戩穀

俞好問摘西銘玉成二字揭之座右俾其子若

孫因名思義克遂有成

天地之心生於萬物其生維何凝沍摧剥蒹葭蒼蒼受
變乃成霜露既殺而況在人貧賤憂戚是為福澤德慧
術知是為疾疾增益不能空乏其身於維此意未或不
仁父母於子夫豈不愛厥既愛之曷驕以敗恩之過甚
如飽則傷所以古人教必義方旨哉西銘造化全體惟
好問父以訓其子他山之石攻玉之工物有相假始就
厥功彼粗而厲此溫而密宛其成矣錯落圭璧如琢如

磨君子自修既恂且慄鐫發孔周匪玉其美伊石其力
生成之德

陳玉巖真贊

爾巾猶古爾鬢未斑畫前有易胸次不允早歲場屋畧
取二三一旦棄去隱几窮探時乎神遊雙溪之間亦有
負苓相與往還怨而無極肯露機緘山空月朗虹貫巖
槃

周公謹贊

儒而俠其非歟屢而隱其幾歟違俗而聾牙玩世而滑稽歟吾亦不自知或隱几著書或狂歌醉墨是殆見吾衡氣機也將求之北山之北忽在乎西湖之西然已見囿於筆墨矣儼幅巾而杖藜

謝竹所歲寒圖

我觀在昔交道實難風雪凌芳衆卉日殫睠乃三友媚於歲寒松勁梅清綢繆相歡竹亦欣然枝舉葉攢如相告語晚節是完復有石交竦立巔岼三而四之愈久能

看允矣謝子取友必端顧彼市道慨其永嘆設圖燕坐
銘詩載刊勿渝此盟以鑒以觀

學古齋箴并序

吾婿張仲實好學者也嘗即其家教授生徒著籍頗衆
束修以養意甚樂而尤與吾鄉鄧善之相友善其之江
陰也善之實繼為之今所謂學古齋者蓋是其處善之
比有遠役此齋復歸張氏程則去蘇實來德孺子箴未
始不同也事彌似其年仲實方念自弛使函漑埽老屋

數椽環以華竹日挾二子開卷其間唔咍聲徹戶外銷
如鸞鵲學子欣然乃皆來集如其初講肄之暇俯仰千
載嘯歌一室自樂其樂書來頗有驕婦翁意余欲扁舟
自致以同其樂而未能也夫世有古今學無古今一人
已之分霄壤懸絕此乃聖師喫緊為人語然施之數學
之室則幾若教人者之為為人而為己者之私為己予
疑焉仲實曰今將使教者以為己之心為人學者以為
人之心為己若何余曰然何教非學何今非古則為之

箴曰

今人與居戢戢同宇古往之宙庶越而語匪好曷求匪
執曷御是以君子惟古是慕學古之齋不過環堵我友
寓之子去我處窓明几淨研席有所爰命二子密侍巾
屨亦有來學五合六聚魚雅童貫其進以序執業呻畢
豈不夙莫其教伊何吾行必與非以為已成人之故雖
我有餘不爾閑拒大匠自治為世規矩其學伊何反躬
內顧非以為人成已是務自足于已不外馳騫舍已而

耘何有黍稷惟學惟教惟忠惟恕古人皆然今人則否
絕今不為是謂學古咨爾學者目擊心悟亦惟敬哉我
仲實甫

漁父聽琴圖

出緇帷坐杏壇環弟子而琴穆然深思蓋託之文王想
見其人漁者何為下船而來持頤以聽既以仁稱夫子
猶嘆其苦心勞形而欲語之以所謂真者豈以文王之
操其有憂患之心乎故其離世遠害甘終身以隱淪然

自居以知道未有真而不仁者也曾餘論之未竟悵莫
駐於挈音

有翅天馬圖

何年塵鏡昏乍洗金背湧出狀怪詭自古空言馬生角
今乃見馬生兩翅恐是渥窪種往往感龍氣龍惟神飛
行天若傳兩翅何足貴想似穆天子會瑤池肉多身重
不得飛一朝乘之逍遙出六合奔風軼電那容追萬里
一息日未旰當時從官無乃疲或云車轍馬迹往往有

如此安用彼翅為徒留誕謔誑後世我願觀者更勿疑
我聞西王母參目而虎首物以類應固宜爾

石上道士閱經圖

石槃槃可容膝山竹亞籬煙直捐爾書捐爾筆嗒然坐

自納息

缺

昔朱桃椎見高士廉瞪視而其意竟莫傳言固不若不
言之全吾終日言而未嘗言亦不自知其所以然是語

是無以問月川

張季宜像

貌古貌巾凡巾孰知其滿腹下筆如神蓋昔之勇冠軍
而今之老斲輪也可為中國之式席上之珍然且弗屑
方超然企涪翁而浥元真

畫竹

臨風永嘯劍戟相摩大節凜然正而不阿
玉立娟娟現清淨身匪雨之力本無垢塵

維翠琅玕高拂晴空朝采之發有若長虹
枝葉清潤發此華滋蒙霧之力而不自知

孟集虛像

黃冠野服翛然於大滌天柱無何有之濱吾與之虛而
委蛇其虛緣而葆真者歟

四虎圖

藜藿不採林有伏猛其何一日朝無骨鯁
驚雷游雪赴此渴吻下噉清泚有文其炳

顧視有威岩下之電不疾而速風行草偃

畫梅

清香襲人無處可著起視天宇參橫月落
老逋之詩逃禪之筆洞其玉屑忽在吾側

畫猫

剪紅以聘文炳如虎鼠輩疾走莫予敢侮

放鶴圖

放鶴兮林臯澹容與兮蕭騷歛素風而孤矯兮舞空中

之落毛翁在南山南北山北兮羌欲往而從之翺翁曷
為自還兮波鄰鄰而送軻軻鶴如迎兮乃下翺婉欲止
兮鏘鳴璫噫吾與汝兮猶未離乎天殽數數然肆可迹
兮宇宙雖大將焉逃吾曾不得夫白鷗兮以為曹吾何
意兮客之適與遭吾氣以為馭蓋未嘗去來兮彼延佇
祇徒勞日暮客去但見鶴啄乎空庭兮首下而尻高我
亦嗒然而忘吾兮眇天地其秋毫

故駕部郎中捫膝先生喻公贊并序

唐時喻鳧天寶末從駕狩蜀嘗為陵州守卒官遂家焉
蜀之有喻從此始其俗益蕃大與牟氏世通婚姻如古
朱陳人以為美談捫膝諱汝礪汝舟則其季也無悶翁
諱煒然皆有文集傳於世越自屬難先父存齋公與舅
氏名繩先後出蜀舅氏寓太湖之西山蓋隱於橘諸子
亦能自樹立不替家聲昔陶潛嘗作外祖孟嘉傳某竊
不自揆援此比為捫膝翁贊當求名筆書而刻之俾後
有攷焉外諸孫牟某讚

蜀有遺直陵陽喻公靖康之末駕部郎中惟國與主已
所願忠陽九百六阨運適逢兩宮北狩外詛內訌金虜
偽首議易宋宗我之百官若盲若聾以次署議屏息厥
恭賊臣邦昌何等妄庸僭干天位自取其凶公于是時
義憤填胸吾膝雖弱與鐵石同誓不少屈以仕楚宮擲
筆竟去矯如驚鴻捫膝之令走卒兒童不肯帝秦自以
為功嗚呼魯連萬夫之雄惟吾捫膝異代同風國有生
氣炎紹再隆揭節諭蜀公來自東一有不合歸卧藁蓬

信意為文大篇春容時乎自寫紙上橫縱奇奇怪怪龍蛇之蹤而其英烈冲斗貫虹奕葉詩書至無悶翁惟我祖母慶善夙鍾越至吾母信安肇封謨焉小子敢昧所從爰述斯讚傳示無窮

贊繆淡圃之祖四訓

繆淡圃以其祖中齋君遺訓四言者求予言衆俱備乃申述其意以復焉

積善曰 有所為而為善必不力能真積力萬善身一

持忍曰 惟不忍於人乃能忍於己忍者義所為忍過
事堪喜

勤儉曰 勤儉必起家更有為己學進修貴自勉斂退
貴自約

安分曰 人生已分事猶恐不得盡雞豚認隣柵毋乃
非吾分 雖然所以行之者一敬而已矣祖訓孔昭淡
圃其懋敬之

陵陽集卷七

欽定四庫全書

陵陽集卷八

元 牟獻 撰

奏劄

咸淳辛未十二月初一日轉對劄子

臣一介疎賤誤玷周行每竊惟念自先臣子才以來世受國恩至深至厚涓埃未報日懼空官茲者皇帝陛下視朔前殿諸門洞開旦氣清明而臣以此時猥當轉對

天光所臨其敢具文以塞故事臣嘗伏讀國史竊觀元祐三年五月一日蘇軾轉對條陳三事其一條曰唐大司門令式云其有無門籍人有急奏者皆令監門與仗家引奏不許關礙祖宗之制自兩省兩制近臣六曹等監長貳有所欲言及典大藩鎮奉使一路出入辭見皆得奏事殿上其餘小臣布衣亦時特賜召問非獨以通下情知外事亦以考察羣臣能否情偽非苟而已伏望更與大臣商議除臺諫開封知府已許上殿外其餘

臣僚舊制許請間奏事及出入辭見許上殿者皆復祖宗故事元祐六年八月一日范百祿轉對亦條陳三事其一條曰太祖皇帝建隆三年詔自今每五日內殿起居翰林學士及文班常轉官轉對既又命尚書省集官議其可者而行之真宗皇帝詔有司錄轉對章疏一本留中祖宗之於轉對其勤且至如此今一歲之中侍朝者有數臣僚每次二員轉對不過十餘人借使人悉知而言言皆見用亦不過十數事耳望詔執事審議轉對

之制悉由太宗真宗舊章二臣之言大祇因轉對以通
下情以廣上意而已臣嘗謹心攷觀元祐五六年間大
小之臣類無不得其言者或入見上十事或經筵陳三
劄此言及君德者也或議差役或爭回河此言及政事
者也或言陝西地震或言冬溫不雪或言日食六分之
變此言及災異者也或十九疏論章惇或十三疏論蔡
確或十疏論安燾此言及小人者也或乞免浙西五穀
力勝錢或乞蠲放戶部餘剩錢或乞取常平敕令刪為

一書且放秋成收糴斗斛此言及民事者也或乞昭寶
元慶厯令內侍省取先朝帳籍比較近年用度之數或
言奉宸庫已取珠子六十斤戶部已用金三千六百兩
此言及節用者也禁中求乳母則劉安世等言之內中
朱紅車子亂行則蘇軾劾之其言及宮闈者如此皇太
后親屬向宗良知邢州則蘇轍言之皇太后親屬撲斷
酒務少欠官屬錢均作七年送納則曾肇等言之其言
及戚畹者如此隨龍馮宗道遷轉則王岩叟言之內批

錢班幹當牛羊司劉言幹當翰林司則曾肇言之一宋
用臣叙復中州刺史則范祖禹以為官寺興土木不可
以復用一陳景元校黃本道書則范祖禹又以為異端
虛誕不可以成宗夫其一時更進迭諫議論已有餘并
包兼容聽受已甚美而臣軾臣百祿猶惓惓以復舊制
議轉對為言豈過計哉忠言利行固不厭其多王道利
宣固不嫌其廣也伏惟皇帝陛下作共即位於今八年
凡其所建植施置壹是皆以元祐為的而聽言一事尤

極謙隆初元詔書盡復祖宗舊制間因臣僚避對則又
戒飭申嚴導人使言固已無所壅蔽乃自比歲頓異流
傳皆謂諸臣進言稍有忤拂聖意厭憚玉色弗怡或顧
左右而言他或視屋霑而不答人臣犯顏逆耳本為難
事藉令未能施用柰何更加沮傷遂使循默成風此豈
盛世宜有我朝以言立國列聖相傳未嘗罪一言者雖
中更大拂亂大傷敗而社稷之長久終有賴于人言然
則人言何負於國倘陛下不察徑銷毀之志士忠臣寧

不為之解體況外而邊事孔繁內而陰邪伺隙日食不見
天且忘予而入冬過燠寒氣未效其何以興來歲寇尅
相挺或能勝予而豐歲且然脫有水旱其何以善其後
惟有一綫言脉所當極意扶持今日果已盡如元祐則
聽言之法固當益循于元祐今日或未盡如元祐則聽
言之法尤當百倍于元祐陛下試取元祐諸臣之論奏
與夫愚臣前者之條陳蠖獲燕閒特賜觀省聖明之意
必將有繫於中其繼自今益恢聖聽毋疑其歸過而賣

直毋嫌其立異而要名凡有苦口之言率皆虛心以攷其懇直恟忱者則欣然容受其忠實有補者則立見施行或者偶非其人則他山之石可以攻玉不當以人而廢言或皆無可採則川澤納汚山藪藏疾亦當容之而勿問庶幾聽言之美一與元祐同符天下幸甚臣於二臣無能為役持援轉對之比以寫憂愛之私干冒天威惟陛下幸赦狀

乾會節進銀狀

武岡

彌月不遲於赫一人之有慶任土作貢丕昭萬國之來
朝上件銀品列於金英生於石地不愛寶式彰萬億年
之休天用降康誕受九五福之壽

申省乞祠狀

某本以濶疎加之閭劣荷明時曲矜於先緒而大造不
棄於微蹤擢之於患難之餘畀之以民社之寄蓋亦自
知其非據猶欲少報於殊私領事以來盡力所至雖一
毫未有於實惠而千里或諒其苦心顧以資淺望輕平

時不足以鎮壓數奇命薄所至輒值于艱虞妖雖人興
咎將誰執何敢效相尤之語但知為自治之規賴廟朝
遠揚於德威幸封境獲清于旬浹有如旁郡之元惡亦
為多方而悉擒尚藉覆存未聞觸罷茲遂書于下考正
當勉于後圖外則障蔽客邪內則補治元氣必得精神
強詡之吏庶無歲月玩愒之風重念某鼠技已窮馬力
既竭況以跨年之久病凜乎末路之難全深恐疾顛有
辜隆使敢據真相上瀆公朝欲乞矜憐特賜敷奏縱未

加于顯黜願亟昇以閒祠得稍遂休息之私實仰拜生
成之德

辭免除浙東提刑狀

除委驟加愚衷增惕伏念某素無能解見謂迂踈自汙
省署之華居慚玩愒比籲祠宮之請實出忱真蓋深懼
于踰涯惟必期于從欲俄蒙簡擢躋昇臬司惟外臺之
寄最嚴而左翊之區至近地大物博岸獄頗滋人微望
輕風稜何有況復侵于多病亦欲遂於稍休敢乞公朝

特賜敷奏收回成煥謹密祥刑或未棄于微踪尙改畀
于小壘庶可效涓塵之力茲允謂生成之恩

申省乞祠狀

某貌爾孱庸誤蒙獎拔平生夢想豈望臺郎旦夕馳驅
況在甸服固知極難于稱塞猶欲少効于疲駑逮此彌
年居然惕日既不能悉聰明智慮坐蔽于獄成又不能
體疾痛癢疴力伸于民隱振揚何有仇怨已多良以物
望之輕祇為明指之玷載惟弱質每覺早衰自夏秋以

訖冬率蓄病而寡懽況心力必凋意緒怔忡無非親齋
居之時固已積曠瘵之咎前奏力祈于夙退庶幾少逭
于疾顛自墮因循第增愧惕茲幸書于下考其敢昧於
初心是用力控微忱上干鈞造欲望察其真切賜以敷
陳特賦祠官俾安愚分別遴時望以重職司誓殫香火
之勤仰答乾坤之施

武岡置靖安寨申省狀

本軍雖為僻壘然西通融桂北控沅靖南連全永家與

溪洞相聯舊來節次於要害去處置立堡寨控扼防札
無慮十五六而後徭省各安武岡一邑雖地無溪洞而
紫陽鄉都分最濶去軍縣且二百餘里其俗頑獷又與
永郡接境往往惡少之所出沒迺無巡寨以為彈壓戊
辰妖寇相挺嘯聚無所控制幾至猖獗本軍隨宜招捕
仰賴聖朝威德隨得弭寧事定之餘儻又不知防守非
所以懲前事而防後患也某雖僥倖替去然不敢不為
此邦長久之慮昨差官相度下育渡乃紫陽鄉要害之

地遂行創立寨屋三十餘間及寨官衙守等皆是本軍自行措辦一毫不以擾民并已齊備了畢今來欲以靖安寨為名招刺寨軍一百人駐北防守見將標釘到已斷妖賊周千四等及其餘妖徒田產盡行籍入本寨充養軍之費或尚支用不敷在本軍隨時那融應付其契勘得本官舊有武陽寨監押一員併同管轄一員闕官歲久欲乞公朝敷奏將上件二闕省罷特置知靖安寨兼巡檢一員專任武岡縣紫陽長溪兩鄉防札之責仍

下吏部作闕許經任人差注或從本軍選辟一名庶幾此寨既建可以聯接聲勢禁伏姦暴千里均拜安靖之福實為利便

牒大禮例庫申省狀

本軍每遇大禮例進奉銀二千二百十一兩一錢四分
隨綱別進奉銀三百八十四兩五錢二分五釐所有價
錢係照指揮截撥及剗刷雜色窠名應副外尚且不敷
舊來弊例或數之質庫墟戶或數之軍縣吏胥甚至有

告許獻助之名本非得已而吏胥緣茲重貽民害質庫墟
戶之往往停閉以避科買市井蕭然日甚一日景曩歲
抵軍詢知此病應詞許並不許告許獻助而他未能區
處也緣本軍以縣為軍賦入有限兼因妖寇調發官軍
民兵為費不貲某不敢以一鏰一粒科擾百姓自行那
融應辦皆出於常年調度之外郡計愈見單窘無可措
畫遂痛行樽節浮費及供給等錢銖積寸累計見錢一
萬貫者創置大禮銀網貼助解庫一坐月收微息專一

椿管不許移動無遇大禮年分收買兩項進奉銀兩除
久例截撥剗刷錢外將本軍三年所積息錢支出添助
上件銀兩價錢咸淳八年明堂大禮為始大約可增錢
六千四百餘貫者比之目今市價畧同在民可無倍費
庶幾稍革科配獻助等弊田間之間生意初回務以仰
稱聖朝嚴恭大禮不瀆不擾之意本軍除以節次施行
外所合具申公朝欲乞劄下本軍照應永為無窮之利

祈雨未獲申諸司狀

本軍今歲苗稼茂盛但自六月以來一向缺雨高下之
田率皆告病早稻抽穗者亦多焦卷連日祈求雖四郊
間有得雨去處却未沾足萬人之命一年之計決此數
日雖已多方疎剔獄訟講行寬恤如諸牢囚繫勘酌疎
放合催錢物等第寬減外竊念謬政致蓄實為守者之
罪豈容恬然自處謹蔬食閉閣自省應出入並用小輜
儀物後樂並省少見身自貶削之意仍備申諸臺乞賜
申奏將某罷黜以謝千里之民

表

賀乾會節表

陽居大夏實符炎運之興德為聖人爰記虹流之瑞亨
嘉之會福祿攸同中賀恭惟皇帝陛下祇適駸猷丕釐
熹命文宜多子共知有道之長漢舉高年尤欲及人之
老時萬時億之德之純臣幸際昌期阻陪賀列周而復
始泰元願神英之增罄無不宜天保效南山之祝

賀壽崇節表

至哉坤元乃順承天誕彌厥月于其王母受茲介福於
萬斯年慶輯無疆歡生有感中賀恭惟壽和皇太后陛
下儉慈是寶恬澹無為在太極先自見兩儀之運以天
下養坐膺五日之朝瑞節相宣瑤觴胥懌臣欣逢華旦
越任黔邦聽長樂之嚴鐘莫陪鳴玉增泰元之神筴復
見循環

浙東提刑到任謝表

右銓惕日方自惡于鵜梁左翊觀風俾載馳于駟轡寵

光烏奕感激輪囷中謝惟民之生皆天所命本無不善
何有于刑自後世尊用司空城旦之書故斯人浸迷關
雎麟趾之意然則臬事亦重矣安得仁者以司之禁於
未然輔所不及矜畀庶戮必深識聖人不獲已之心明
清單辭類皆非俗吏所能為之事蓋咨淑問庸受嘉師
伏念臣見謂謫能粗承忠教帶衡佩矩僅守曲士之尋
常錯節盤根初茂良工之剗劂荷曲予於先緒每加錄
於後踪出領州麾專城良忝入汙省戶典選何禪自知

稱塞之難願循止足之分俞音汭閱誤渥更加叨乘使
傳之華越在帝王之近然而地大物衆曷諏度之能周
人微望輕於振揚乎奚有覺鉛刀之甚鈍懼繡斧之莫
勝視事云初撫躬增惕茲蓋恭遇皇帝陛下好生如舜
克寬若湯得位曰仁式廣天地之大德措刑不用方臻
帝王之極功爰重職司以嚴甸服臣敢不明謹于獄殫
既厥心迭禮樂而有光愧曷當於華選畫衣冠而不
犯惟仰贊于盛時

謝告奏

將命俶臨贊書申錫罷臨所被戴捧奚堪恭惟皇帝陛下體念臣工惠綏畿服訓詞至厚蓋有三代之風威嚴在前不違咫尺之地綸音所達節瑞以光臣自愧微踪驟膺隆使維丕顯休命何以對揚監於茲祥刑尚思勉厲

賀明堂慶成表

度九尺之筵稱秩元祀歌萬年之頌申命用休慶衍宗

祔澤流函夏中賀恭惟皇帝陛下齋莊中正寅畏嚴恭
式彰致美之忱菲食如禹聿嚴昭事之德卑服即文宜
迄用于肇裡而畢來于諸福臣濫將隆擢幸際昌辰宮
廟駿奔莫贊聲明之盛邦家燕祉益祈運祚之長

賀皇太后表

世室合祛肇成熙事東朝介福喜溢慈顏萬國咸歡兩
宮交賀中賀恭惟皇太后陛下功高保佑德備徽柔肅
在廟之忱此思齊所以聖等如山之壽曰天保莫不增

屬載舉于縟儀庸茂迎于景貺臣親逢盛旦濫玷使華
燕及皇天繁祉願綏于文母于彼原隰懽謠樂聽于堯
民

賀皇后牋

禮嚴上帝於皇旒璫之儀美萃中宮爰贊玉盥之祀萬
方禔福三殿均懽中賀恭惟皇后殿下文定厥祥柔嘉
維則夙有家而警戒孝敬相成茲在廟而肅雝徽音是
嗣贊今日王猷之盛踵我朝后德之賢臣拭目邦榮縻

身外服乘文顯相莫陪多士之聯移俗厚倫共美二南
之化

謝赦表

熙事備成禮嚴三載慶條敷宥和暢九域聖澤流行嘉
生歡懌中謝恭惟皇帝陛下寅恭饗帝忠厚承家神感
至誠已聿懷於多福邦有大賚用斂錫於庶民開釋無
辜薰蒸極治臣初將隆指即奉寬書湯網濶疎咸識自
新之路呂刑明恤益宣不殺之仁

賀壽崇節表

四月維夏日行南陸之長八千為春天錫東朝之壽宮
闡輯慶海宇均懽中賀恭惟皇太后陛下秉德靜專游
神恬澹詩歌震夙生民時維姜嫄易用正中介福於其
王母穀旦相先於嘉會藻旒親奉於怡愉臣幸際昌期
敬哀善頌近畿持節莫陪長樂之儀廣內稱觴第想瑤
池之集

賀乾會節表

歲在壽星爰紀誕彌之節陽居大夏況逢長養之辰華
渚流光寰區輯慶中賀恭惟皇帝陛下聰明天縱聖敬
日躋億載怡愉方奉稱觴之樂四方綏靖自臻磐石之
安于萬斯年既多受祉臣欣逢盛際敬輯頌聲自慚周
雅之使臣阻陪在列願與帝鄉之父老仰祝殊齡

陵陽集卷八